

**Perkasakan bahasa Arab di sekolah – Abdullah
Utusan Online
06 April, 2012**

KEPALA BATAS 5 April - Sistem pengajaran dan pembelajaran bahasa Arab di sekolah perlu diperkasakan setaraf dengan bahasa Melayu dan bahasa Inggeris bagi melahirkan pelajar yang cemerlang untuk mendalami bahasa al-Quran.

Bekas Perdana Menteri, Tun Abdullah Ahmad Badawi berkata, suasana pembelajaran di sekolah yang menjadikan bahasa Arab sebagai bahasa pengantar amat baik kerana secara tidak langsung melahirkan pelajar yang dekat dengan Islam.

Menurutnya, sekiranya pelajar fasih berbahasa Arab mereka juga tidak akan dipesongkan oleh kumpulan-kumpulan tertentu yang menggunakan agama Islam dan bertutur dalam bahasa Arab untuk mempengaruhi orang ramai terutama pelajar.

"Satu sistem pembelajaran khusus perlu diadakan untuk melatih tenaga pengajar agar mendalami bahasa Arab sebelum mereka turun menyampaikannya kepada pelajar-pelajar di sekolah.

"Pelajar yang fasih berbahasa Arab juga mampu mengelak daripada terpengaruh dengan kumpulan pelampau agama atau ajaran yang bukan-bukan dan menjadikan bahasa Arab sebagai bahasa perantaraan mereka," katanya.

Beliau berkata demikian ketika berucap pada majlis Penyerahan Cek Bantuan Sekolah Agama Rakyat (SAR) dan Kelas al-Quran dan Fardhu Ain (KAFA) Parlimen Kepala Batas di Madrasah Nurul Huda, Lahar Endin di sini hari ini.

Sebanyak 19 SAR dan KAFA menerima sumbangan daripada Kementerian Pelajaran bernilai RM21,974.54 setiap sekolah dengan jumlah keseluruhan RM417,516.26.

Tambah Abdullah, satu sistem serta pusat latihan khas kepada guru-guru perlu diwujudkan untuk menyediakan mereka terlebih dahulu sebelum mengajar di sekolah-sekolah.

Jelasnya, perkara itu tidak boleh dilaksanakan dalam sekelip mata kerana sistem tersebut berkait dengan dasar serta proses-proses tertentu.

"Tapi kita kena sabar bersabar sebelum dapat melihat hasilnya yang suatu hari nanti sekali gus menjadikan sistem pembelajaran kita disegani oleh negara Islam lain.

"Pembelajaran bahasa al-Quran ini juga perlu berterusan dan sepanjang masa sama seperti proses memperkasakan semula tulisan jawi di sekolah," ujarinya.

Menyentuh mengenai bantuan kepada SAR, Abdullah menasihati para pentadbir sekolah menggunakan sumbangan tersebut sebaiknya untuk meningkat kemudahan yang ada di sekolah masing-masing seperti membaiki kerosakan peralatan atau membeli kitab-kitab rujukan.

Katanya, sekolah agama menjadi pilihan orang ramai untuk mendalami ilmu-ilmu yang tidak diajar di sekolah biasa dan ia adalah tempat terbaik menyediakan didikan agama kepada anak-anak

Source:

http://www.utusan.com.my/utusan/info.asp?y=2012&dt=0406&pub=Utusan_Malaysia&sec=Utara&pg=wu_01.htm